

卷一

禮記



瑞州府

在省城西商  
三百八十里

寰宇記之筠州也記曰州城卽漢建成縣屬豫章郡唐武德五年安撫使李大亮宣撫江南乃于此置靖州七年改米州又改筠州後三年省南唐復置宋因之後賜名高安郡寶慶初避理宗諱改名瑞州因其時有靈芝之瑞故名元改瑞州路 國朝設府領縣三

高安縣

附郭

漢高帝六年置建城縣于豫章以初剡城邑爲名後漢靈帝析建城置上蔡縣顧野王輿地志云以



汝南上蔡人分徙于此孫吳增置陽樂宜豐二縣  
晉武帝太康元年以上蔡人思本土改爲望蔡又  
改陽樂曰康樂隋開皇中廢望蔡康樂宜豐三縣  
入建城唐武德五年以避隱太子諱改今名縣治  
在宋爲水北先鋒營故址○黃庭堅江西道院賦  
序畧云江西之俗士大夫多秀而文其細民險而  
健以終訟爲能由是玉石俱焚名曰珥筆之民雖  
有辯者不能自解免也惟筠爲州獨不囂于訟故  
筠州太守號爲江西道院然與南康廬陵宜春三  
郡並蒙惡聲元祐八年武陵柳侯子儀守筠之明

年也樂其俗之媿使爲政者不勤乃新燕居之堂  
榜曰江西道院以鼓舞其國風且爲高安之父老  
雪耻焉秋七月遣使來告成于雙井永思堂于是  
爲之賦曰勾吳之墟維斗所直半入于楚終蝕于  
越高安之城豫章之別雖風氣之未遂亦媿俗之  
可悅故柳侯下車解牛而不割未嘗發劓初不折  
缺則喟然嘆曰江西道院名不虛生云云今扁其  
名于府廳後○南唐昇元中陳承昭來牧始築羅  
城濬溝洫于縣治剏虛窓登閣邃廡深院見殷觀  
筠州闕城碑記○志云錦水自州西南來折而東



注界爲兩厓漢晉舊有城池世遠圯塞唐武德中  
李大亮始築土城浚濠以受之○碧落山在府治  
後上有碧落堂登之一郡井邑盡在目中宋楊廷  
秀留題詩云仙人白日上青冥千載如聞月下笙  
南北萬山俱在下中間一水獨穿城○歐陽守道  
記畧曰碧落仙籙中有之碧天之蒼蒼色也落始  
也猶言太初元始也高安郡于江西稱道院郡治  
在山間相傳爲上古仙人李八百脩煉之所異時  
守者因山爲園亭盡曲折登覽之趣其命名率取  
方外語而最高處有碧落堂下俯萬山一水穿城

南北岸萬家巍巍樓臺皆可指數誠齋先生在郡  
日詩爲此堂賦者八章景定庚申北兵奄至焚郡  
堂在山巔不得免焉後四年余友文君天祥宋瑞  
自著庭出守其秋堂復成刻誠齋詩其上九月九  
日携客落之屬詠秋晚風高君意更在極目之外  
遣使以圖與詩屬余爲記夫此誠齋所謂滕閣鬱  
孤皆不及者附余列名不亦幸乎○碧落山一名  
鳳皇山唐武德中應智瑱爲州刺史時鳳皇集此  
山故名智瑱州之調露鄉人○鳳皇山下卽郡廨  
也後有五龍岡前臨蜀水明香真人學道處明香



蜀李八百妹也初脩道于華林山元秀峰後于峯南六十里五龍岡設壇醮祭道成冲舉唐天寶中卽其地爲元陽觀按華林寶錄高安稱蜀水八百又蜀人明香得道之說必有所據相傳李八百洞在治後圃五龍岡元陽觀在治西逍遙山上今爲妙真宮□輿地紀勝州後圃有洞閉塞不可入紹興壬申太守羅薦建屋洞傍名曰迷仙洞□蜀江志云郡圃崎嶇高下斷崖深壑宛如洞府澄江遠岫層出叠見于樽俎之間乃有井井一區名玉井有玉井亭俗傳李八百穿七井以象斗極教授廳

井是其一也又有劔池云李仙磨劔處恒產白蓮黃山谷賦製劔池之菡萏以爲裳卽此□棲真堂相傳李仙故居中有遺像楊廷秀詩李真宅子故依然道院西偏古洞前一日身游八百里三番花落九千年劔池丹井俱蒼蘚絳節霓旌已碧天借問飛仙那用步步行猶是地行仙其後改爲棲真亭有郡丞孫大雅記鍾離仙人飛墨草書又有偃松亭在州宅陸務觀詩巨松偃翠蓋閱世巋獨存頗疑古仙翁藏丹在其根或是結靈藥百尺有伏龜終隨風雨化不死何足言○翠樾亭一名半山



亭蘇轍詩一夜飛霜點綠苔曉來黃葉掃成堆檐  
前翠樾凋疎盡放却墻頭好月來○蘇子由東軒  
記畧云余既罪謫監筠州鹽酒稅未至大雨筠水  
泛濫滅南市登北岸敗刺史府門鹽酒稅治舍俯  
江之潛水患尤甚既至敝不可處乃告于郡假部  
使者府以居郡憐其無歸也許之歲十二月乃克  
支其款斜補其圯闕廳事堂之東為軒種杉二本  
竹百个以為宴休之所鹽酒稅舊以三吏共事余  
至二人者適皆罷去事委于一晝則坐市區鬻鹽  
沽酒稅豚魚與人爭尋尺以自効暮歸筋力疲廢  
昏然就睡不知夜之既旦旦則復出營職終莫能  
安所謂東軒者每旦暮出入其傍未嘗不啞然自  
笑也子由又于東軒種蘭有蘭生幽谷無人識客  
種東軒為我香之句按紀勝云東軒今為貢院地  
元豐中子瞻自黃移汝取道筠州訪子由留東軒  
十日而去即此口象之又云藥城嘗假居皇華館  
即今之行衙也公病中與賈守遊中宮僧舍詩云  
東鄰脩竹野僧家亂柳枯桑一逕斜逐客慣曾迂  
短策使君何事駐高牙○志云小洞山在府學之  
右有清規寺蘇子由與太守毛維瞻采菊于此余



襄公靖謫筠州監酒稅時無事作澗山傳法記卽此○小雲居在來賢鄉資教院藥城集有次王適韻遊小雲居詩又紹聖間以門下侍郎再謫有雨中遊小雲居詩右去城南七里□來賢鄉有昇元觀舊有許旌陽仙迹壇唐中和七年生瑞竹自根至三尺岐爲兩竿宋政和八年勅取入京○廣福寺今爲筠陽書院在水南朝天坊本宋郡學基紹興二年學徙鳳山以此爲寺蘇子由謫居之歲子瞻便道視之寓于此先夕無約而夢及之因名其堂曰同夢詳見大愚山○錦江亭在水南大街東下瞰蜀水因以爲名古讖云錦水入市河朱紫滿城多唐雀鷓娑娑集有錦溪詩其序云錦水在蜀江門外卽此○寰宇記云蜀水在縣北三聖源出縣內小界山東流五百九十里入南昌縣與章水合耆老傳云許遜爲蜀旌陽令時人皆疾病多往蜀請救遜與噐水投上流飲者無不愈邑人神之因名蜀水□舊圖經云唐顯慶四年漁人于蜀水江中網得青石長四尺濶九寸其色光潤異于他石懸而擊之其音清越都督表納于瑞府□子由有乘小舟出高安詩朝來雘酒江南寺日暮歸爲



江北人又云微官終日守糟缸風雨淒淒夜渡江  
卽蜀水也隄上有蜀江觀觀有聖水井○上蔡門  
府之西南城門也有龍化山相傳東晉時有龍于  
山上噓雲化去山之開善院唐俱胝和尚自婺州  
金華來結菴於此傳燈錄以俱胝參天龍天龍出  
一指示之得悟○龍岡在城西一里顏魯公戒壇  
記畧曰惠欽乃徐孺子之後削髮于高安之龍岡  
寺開元末北游京師名動輦轂祿山亂乃南歸洪  
州之西山○朝陽門府之東南城門也踞大愚山  
唐有大愚禪師得法于歸宗結菴大愚灘頭因以

大愚爲號宋呂祖儉安置筠州寓山之真如寺亦  
號大愚叟蘇轍詩東郊大愚山自古蒼荀林卽此  
東坡訪子由時值端午遊行真如同陸游轍謁照  
公長老畱詩下韻輿地碑目有東坡書大愚石臺  
山詩在本山○宋時城南有建山寺冷齋夜話云  
蘇子由謫高安時雲菴居洞山有聰禪師居聖壽  
寺一夕雲菴夢同子由出迓五祖戒禪師聰亦夢  
俄而東坡書至曰已至奉新旦夕可相見子由携  
二衲候之建山已東坡至坐定二衲共理夢事坡  
曰軾八九歲時常夢是僧往來陝右又先妣方娠



夢一僧來托宿瘡而眇雲菴驚曰戒故陝右人失  
一日暮年棄五祖來高安終于大愚逆數恰五十  
年東坡時年四十九矣乃與雲菴啟其捨曰戒和  
尚不識人嫌強顏復出亦可笑○寰宇記云康樂  
故城在縣東北四里宋武帝二年封臨川內史謝  
靈運為康樂侯就第即其地也其城外週迴山水  
謝公無日不游宴有書臺石硯存有墓在治南三  
里○吳虎臣湯錄云豫章康樂縣有淶水烏程鄉  
酒官每取以為釀其旨美與湘東鄴湖水同世稱  
鄴淶酒本此○幸龍王潭在府西五里世傳唐幸

南容在汴京托鄉里寄書曰城北門數里有潭其  
傍古木即吾家也叩之必應持書者如所戒果有  
二童子出俄一丈夫繼之宛如汴京所見邑人聞  
而神之為立廟以祈雨賜按南容高安人舉貞元  
進士與柳子厚同年柳送之歸序畧云登太常之  
籍應邯鄲之召文章之美雖枚生長卿無以過之  
仕至祭酒墓在縣西七十里○鈞山在縣南十里  
有宋劉渙故宅山北有劉道原恕讀書堂山巔有  
劉仙翁洞仙翁廬陵人來游蜀水逐鹿入洞而遇  
仙渙其裔也渙字凝之天聖中進士及第歸隱廬



山三十年歐陽脩廬山高詩爲其作幸元龍記云  
公縣之鈞山人仕爲穎上令以忤上官歸隱廬阜  
田于落星之灣秦犢爲騎三十餘年忍窮如鐵石  
呂西澗先生嘗與嘉禾陳公舜俞自南康反筠訪  
疑之干淨慈院留詩壁間志云淨慈院在城西南  
六十里劉屯田故居也壁上有歸來重喜訪僧鄰  
之句子恕孫義仲皆聞于時○風俗記云黃紫庭  
故宅在城東北二十里古祥符觀是其處紫庭名  
仁覽許旌陽之壻也仁覽得旌陽道術嘗爲青州  
從事家在高安每夕取青竹杖喫水化龍騎歸曉

又騎去後亦舉家上仙里人于其騎杖處立筍竹  
廟祀之廟去宅一里志云在城北十五里東岡上  
又云仙人黃昌宅在玉晨觀按紀勝觀直縣東七  
里晉黃仁覽煉丹淬劍之所俗呼黃仙觀元豐中  
蘇子由偕太守毛維瞻來游有白鶴翻飛終不返  
黃冠憔悴只躬耕之句寰宇記又載祈山觀在縣  
東北二十五里晉元康六年道士黃輔全家上昇  
之所按輔字萬碩建城安仁鄉人有高行郡舉孝  
廉穆帝時仕至御史以晉室不綱權臣炫命見幾  
而退子仁覽仕從事非其志父子褰裳歸西山從



許旌陽游黃昌或與仁覽是一人○荷山在治南二十五里上有蓮池豫章記云仙人王子喬駕白象至此象化爲石今山頂有丁王二仙壇山下有棲霞觀古之三皇觀也唐武德初室中有自然鐘磬音慶雲集其上山前一峯如橫琴曰琴嶺上有仙跡楊廷秀碧落堂曉望荷山詩荷山非不高城裏自不見一登碧落堂山色正對面如人卧平地躍足立天半晨光到岩壑人物俱舊綉綠屏紛開闔翠旗閃舒卷安得垂天虹爲橋度雲巘予友人高安陳德遠邦瞻有荷花山房集其名木此○米山在城北二十五里豫章記云此山四面流泉土地膏沃生禾香茂爲米精美唐立米州之名取焉按志米山廟神李英本州人唐武德中爲高安尉刺史應智瑱命伐金牛而卒歿後爲神○鐘口江在縣南三十里豫章記云昔有人于此水濱獲古鐘九乳形制竒古因以名江江源出于荷山歸于蜀水○紀勝云真君栢在縣西南四十五里集仙觀中栢三株皆許旌陽手植又丹井一○塚記云城西五十里有唐沈彬墓彬字子文縣人能詩遭世亂隱雲陽山楊吳辟之授校書郎及南唐篡吳



遂不仕進李璟優擢吏部尚書不受嘗手植一樹  
命諸子曰吾死塋此樹下及卒發之得石擲刻云  
添燈猶未滅留待沈彬來因就塋焉其渡湘江詩  
數家漁網疎烟外一岸殘楊細雨中人爭傳誦之  
○華陽實錄云鳴水在城西北六十里北流合奉  
新江碧澗飛流空谷振響絕頂有石高數丈以物  
扣之其聲如鼓其北有噴雪泉仙人呂洞賓游醮  
時以劍插地而泉歛出故名○又十里爲白雲山  
下有超果寺寺東西澗皆有瀑布水柳州教授孫  
伯濫有記謂之小麻姑○輿地紀勝云縣之調露

鄉有白鶴山山下有崇元觀梁太清二年置按觀  
記晉丁義真君女秀英煉丹之所吳采鸞嘗就學  
焉今石圃中猶有丹井及仙去塋衣冠于觀北俗  
云丁仙姑塔是也觀右半里有石峽噴雪如廬山  
玉泉志云在城西北七十里仙姑騎鶴飛去山名  
觀名皆因之○碑目云唐中和二年石刻在調露  
鄉唐兩賢祠中兩賢者應智瑱幸南容也貞觀初  
里人爲靖州刺史應君專祀元和時廟壞進士幸  
南容脩之寶曆中里人併祀應幸二公莆田黃滔  
爲碑記李德裕時爲袁州長史爲書祠額○豫章



記云吳真君每齋醮日輒有鶴數百棲息垓所旬日方去又多彩霞覆其上因名其處爲飛霞山山南半峯有一塘塘中有石臺在縣西南七十里○華林山在城西北七十五里相傳西王母第九子玄秀真人于此築壇以祭靈仙唐初應智瑱遣義軍羅武于壇西立三將軍廟至今呼爲羅武廟先是隋大業間蕭銑林士弘攻掠江南智瑱于華林山置雲棚城召義兵保安此土武德五年歸唐高祖以爲靖州刺史○紀勝云華林山玄秀峯有浮雲觀唐孫志諒創室隱居處玄宗時兩召見闕下

時人常見其室上雲氣飄颻因號浮雲觀又云浮雲山是唐張惠載中舉之地上有應智瑱飲馬池去縣北五十里○宋永初山川記云建城縣西有羊山山上產燃石色黃白而理粗以水沃之旋熱猶石炭着鼎其上可以熟物晉元康中雷煥入洛以示張華茂先卽此物也于是始識此名今蜀江志載高安縣有石炭嶺王象之云土產篁竹故唐以米州改筠州○按蜀水水經注作濁水其文曰濁水出康樂縣故陽樂也濁水又東逕建成縣漢武帝元光四年封長沙定王子劉拾爲侯國王莽



更名之曰多聚矣縣出然石異物志曰石色黃白而璽疎以水灌之便熱著鼎其上炊足以熟置之則冷灌之則熱如此無窮晉元康中雷煥入洛齎石以示張茂先卽此物也

上高縣

在府西南五里

本漢建城地顧野王輿地志云靈帝時分建城置上蔡縣晉改爲望祭唐武德中併入高安僖宗朝鍾傳始建止高鎮于此寰宇記曰以地形高上得名僞唐保大十年昇爲縣迄今不改按志縣城迺廻五里萬載新昌之水滙于凌江而界其中縣治

前蜀江之上有流花亭多宋人題詠化龍巷口有桃李春風樓亦宋時建○縣學前深潭中有二石相疊似合而分名曰金石有金石橋在學左水自教峯發源經橋下入蜀江有學碑蘇轍記○羅漢石在水南聖果寺之側其東爲鸕鷀洲正當縣之水口卽地鈴所云鸕鷀洲合狀元生者其南十里有石豐上銳下名葫蘆石○鏡山在縣東二里山有三峯端圓如鏡相對而峙一逕可通人行○教嶺在縣北三里晉教真人得道于此煉丹之迹猶存上有磨劍石一作教峯○縣北十五里白馬山



舊時常有白馬齒草山頭人至輒不見他日復然  
 ○西北十五里顧城山下有米城亦取米州之義  
 ○縣南二十五里靈峯山風雨晦冥之夜山放赤  
 光其大如斗相傳以為金雞神也峯前有銅丁嶺  
 舊云許旌陽以銅丁釘蛟于此一名銅精嶺○近  
 靈峯有寶蓋山嵌巖岌峩霏靄翠玲瓏中有寶雲院  
 又五里有寶珠嶺世傳道明禪師自廬嶺來卓錫  
 夜恒以寶珠照示十方○蒙山在縣南五十里峭  
 壁橫險厥材千尋常有烟霧蒙蔽其上週迴一百  
 四十里山有多寶峯上下兩洞上洞玉沼常戶不  
 堪游歷下洞廣僅函丈深邃難窮中有石佛石僧  
 石獅子羅漢坐之類又有一石立巖間上下靡附  
 謂之無根石山之陽有元正德書院提舉姜榮建  
 承旨趙孟頫碑宋蒙山務設于山下○慈光洞在  
 縣西四十里緣梯而下然後有門得入昔有避兵  
 其中者題壁云唐乾符二年黃巢作亂在此逃避  
 其處又有鄧敖二仙洞○碑曰云施肩吾淨居寺  
 碑在縣西四十五里舊曰龍居寺隋置唐貞觀廢  
 大曆中重興太和申進士施肩吾立碑○又五里  
 為仙聖洞洞中石佛石鐘等宛顛蒙山九峯踞



頂竒秀峻拔莫可名狀蔣之竒詩綠澗攀厓入翠霞寺僧猶記舊鍾家芙蓉秀出天河外我欲名爲小九華蓋九峯寺乃南平王鍾傳捨宅也又十里別有九峯山突兀出于雲表亦名末山○寰宇記云謝山竒峯惟石卅竈履迹猶存有謝真人祠去縣西六十里按卽志之謝君嶺舊傳謝仲初尋真至此○縣西北六十里有禮架嶺嶺峻多石澗深且濶兵燹時土民多避此寇亦不能近之有石笋高七八丈號插天石○縣西八十里香山院唐建有過客題其壁云誰將萬斛旃旌子撒向千春古道場萬壑曉風吹不斷至今猶有滿山香其處有四溪洞深數里有後門供一石佛在棲真院側○又十里爲黃鳳嶺俗傳有鳳凰集此山色不彩而純黃故名按豫章記王子喬跨黃鳳至白象山疑卽一事○洞山記云金剛嶺在本山昔第十代祖智慧禪師栽松于此處每栽一本誦金剛經一卷又名萬松山○王象之記曰上高有法忍寺初無井每以行汲爲病許真君過之拔劍插于半山之間水泉湧出人呼聖井云

新昌縣

在府西百四十里



宋太平興國六年分高安縣之太平等七鄉置新昌縣元元貞初陞爲州 國朝仍爲縣治在鹽溪之東古鹽臺也鹽溪一名若耶溪自分寧縣發源出凌江入上高東流入蜀江遶治南鹽嶺高出群山下瞰邑市鱗鱗可數故以爲名○宋劉愿新昌門樓記云初鹽步鎮有蔡氏兄弟曰岑曰嵩相與議于州曰鎮去高安之西百里而遙其林壑盤紆川原迴遠且南與蒙山爲隣不置縣恐非所以便民而戢奸也願竭力以佐公家費州請于朝乃縣之今主簿廨東有靈椿廟以祀蔡氏兄弟者門樓荆于鉅野晁達子開以紹興二十七年知縣事○宋黃庭堅芝亭記云晉陵邵君叶爲新昌宰視事之三月靈芝五色十二莖生于便坐之室吏民來觀無不動色相與言曰吾令尹殆將有嘉政以福我民乎山川鬼神其前知之矣乃相與廓其室四達爲亭而來謁記于庭堅云云按新昌瑞芝是元祐八年事今縣東二十五里有瑞芝橋乃元時產芝處○縣尉廳石刻詩云到此未逾月沿封十往還路危頻駐馬力倦怯登山親老難辭祿時平可養閒自憐清節苦誰爲達天顏蓋宋呂吉甫父鎮



國公惠照院之作公嘗爲新昌尉生丞相于廨舍  
云○方輿勝覽云縣有丞相堆蓋晏元獻殊舊宅  
也志謂在新安鄉○輿地紀勝云濯湖在東門外  
昔許旌陽濯衣其中至今水清澈不受垢汚土人  
名爲真君濯衣湖○縣西有龍泉洞其源出離相  
院穿地十里乃出宋雀鷗爲筠州推官嘗來游有  
記○五色泉在縣西十里淨慧院土人謂之乳泉  
取而酌之五色鮮瑩○石臺山在縣南二十里上  
有清涼院蘇子瞻兄弟來游有贈長老問公詩東  
坡筆刻寺中按方外志問公嘗手寫蓮華經字如  
黑蟻卧不就席者二十年故東坡詩有誰信吾師  
非不睡睡蛇已死將安眠欒城詩有蒲團布衲一  
繩牀心地虛明睡亦忘之句○五雲觀在縣北二  
十里許旌陽嘗游今石上有仙人跡○淵明洗墨  
池在縣東二十五里紀勝云陶元亮讀書堂在新  
昌延禧觀之七里山有洗墨池在書堂前觀後有  
淵明墓按圖經載陶潛家宜豐縣親老家貧起爲  
州祭酒徙家柴桑暮年復歸故里今縣東二十里  
義鈞鄉有淵明里其居人多陶姓鄉之南山有靖  
節祠城塚記云宜豐故城在天寶鄉去縣三十里



乃孫吳析自建城縣者隋唐間廢○志云天寶鄉有楊將軍住場楊行密之居也又有廣門院舊名石門聶樞密山之居也○樂城集聰禪師塔碑云唐肅宗少子出家居逍遙山號國師賜田甚廣至宋紹興寺廢真身塔猶存按逍遙山在縣之天寶鄉塔在資壽院○三聖嶺在洞山金剛嶺之東昔雪峯欽山巖頭三禪師菴居此嶺各著異迹因名志謂嶺在縣東北五十里其處普利寺中有黃庭堅所書新豐吟碑刻○洞山院在縣西南五十里有宋太宗仁宗所賜碑本御書飛白草字及經傳

等六十卷并鍾傳鐵釜經又有楊行密銅鐘元豐間蘇轍與洞山文長老詩又有雪中洞山黃蘗二禪師相訪詩○縣東北五十里洞山寺水口有夜合石高丈餘土人謂二石夜間常合為一○吉祥山在縣北五十里一名瑞雲唐悟本禪師居此山有聰明泉及吉祥院○縣東北六十里玄道觀東有雲峯壇仙石迹龍潭及許仙葛仙二橋○西嶺在縣北六十里坐西而望東山兀起蹲伏若翻舞狀亦曰攀龍山北嶺在東北七十里截出雲外如屏障峯巒相倚紫翠萬疊陰晴異色有飛瀑三四



道頗爲奇觀○高湖山在縣西北七十里劉禹錫  
記云自漢時已有仙壇在于絕頂水旱禱焉○尉  
山在縣東七十里南昌尉梅君所游陟上有宅仙  
觀祀梅福舊記云今爲靈虛觀亦名梅仙觀謂梅  
真人故家于此○八疊山其形盤鬱疊嶂縱橫斷  
而復續因以八疊爲名在縣西北九十里○庚溪  
詩話云黃蘗山一名鷲峯在新昌縣西百里廣賢  
鄉唐宣宗微時以武宗見忌遜迹爲僧至此與黃  
蘗禪師同行觀瀑布黃蘗詩句云千巖萬壑不辭  
勞遠看方知出處高宣宗續云溪澗豈能留得住  
終歸大海作波濤余閩中亦載之○碑目云淨覺  
寺唐柳公權書額距黃蘗山二十里環寺皆奇峰  
按傳燈錄爲常觀禪師駐錫之地寺舊藏蘇文定  
公夫人史氏印施楞嚴標指要義十卷每卷末有  
文定親書佛弟子史氏印施周益公跋記後併刻  
于石



饒州府

在省城西領縣七  
南三百里

春秋楚境史記吳伐楚取番是也秦併天下番陽

屬九江郡漢初屬淮南國後屬豫章郡東漢屬廬

陵郡建安十五年吳始置鄱陽郡治舊縣未幾徙

治吳芮故城歷晉宋齊不改梁置吳州陳曰鄱陽

隋初江州總管千金公權璋奏罷鄱陽郡置饒州

按徐湛記郡北有堯山地加饒衍益食而為饒矣

自是唐宋之季或稱鄱陽郡或稱饒州更置不一

國初尚曰鄱陽府尋改饒州○唐劉長卿貶南巴

至鄱陽題李嘉祐江亭詩巴嶠南行遠長江萬里

饒州府志卷之二



隨不才其謫去流水亦何之地遠明君棄天高酷  
吏欺青山獨往路芳草未歸時流落還相見悲歡  
話所思猜嫌傷蕙苴愁慕向江籬柳色迎高鳩荷  
衣照下帷水雲初起重暮鳥遠來遲白首看長劍  
滄洲寄釣絲沙鷗驚小史湖月上高枝稚子能吳  
語新文怨楚辭憐君不得意川谷自逶迤又至鄱  
陽尋陶十七不遇詩謫宦投東道逢君已北轅孤  
蓬向何處五柳不開門去國空回首懷賢欲訴冤  
梅枝看嶺嶠竹路過湘源月下高秋鴈天南獨夜  
猿離心與流水萬里共朝昏李白送弟赴鄱陽詩

馬詩桑落洲渚連滄江無雲烟潯陽非剡水忽見  
子猷船飄然欲相近來遲杳若仙人乘海上月帆  
落湖中天一觀無二諾朝歡更勝昨爾則吾惠連  
吾非爾康樂朱旆白銀章上官佐鄱陽松門拂中  
道石鏡迴清光搖扇及干越水亭風氣涼與爾期  
此亭期此秋月滿時過或未來兩鄉心已斷吳山  
對楚岸彭蠡當中洲相思定如此有盡窮年愁顧  
况憶鄱陽舊游悠悠南國思夜雨江南泊楚客斷  
腸時月明楓子落宋王十朋送莫志歸鄱陽鄱湖  
秋水落白下買舟還遠夢驚新鴈歸帆謝舊灣打



碑過薦福携酒看芝山却憶曾游處清溪萬柳間  
○興地碑目云鄱陽郡志史定之序○容齋隨筆  
云鄱陽舊無圖經元祐六年餘干進士都頡作七  
談一篇其叙土風人物云張仁有篇徐濯有說顧  
雍有論王德璉有記其所引張徐顧王諸書俱不  
存矣○三筆云饒州良牧自吳至今以政緒著者  
有九賢郡圃立祠祀之按九賢吳周魴晉虞博王  
虞梁陸襄隋柳莊梁文謙唐張廷珪顏真卿李復  
等後又增李吉甫馬植爲十一人也○輿地碑目  
引白樂天集有鄱陽吳府君碑又有唐紫極觀鐘  
銘天寶九載上官經野文南唐能仁寺菩薩堂記  
邊鎬文俱在城內○文獻通攷鄱陽集十卷徽猷  
閣直學士鄱陽洪皓光弼撰皓奉使金虜守節不  
屈旣歸爲檜所忌謫英州死之迺遵邁俱其子也  
○東臆集四十卷中書舍人鄱陽張廣彥實撰與  
呂居仁爲詩友○游宦紀聞十卷鄱陽張士南光  
叔撰○絳帖二十卷鄱陽姜夔堯章校定

鄱陽縣附郭

秦番縣也吳芮爲令土人稱爲番君漢加陽字王  
莽改曰鄉亭東漢復舊而番字始從邑爲鄱○通



志云府城漢吳芮築廣周七里孫吳周魴增九里三十步宋紹興間史定之又增至十二里皆因舊基按今縣東六十里之故縣渡又有鄱陽城不詳何始漢末吳初魯一居之尋卽移吳芮城至今不改○我明洪武元年

太祖克江州因幸鄱至南門外御書城隍之神爲顏祀以少牢然後翼騎而入駐蹕于南城○郡之西南桃源山麓孫吳之理所也元季捨攘吳宏據之爲行省今千戶所是其地有流杯池宋范仲淹爲守所鑿 國初洪武己酉卜安國寺故址以建

郡治宣德庚戌改建于梁蕭恢遺宅按恢梁鄱陽王也故宅之西末寧寺卽王所建又名末福寺輿地紀勝云末寧寺九眼井是蕭王宮故蹟末福寺東胭脂橋昔時蕭氏粧樓宮人棄脂水流山橋下故名○方輿勝覽云州宅有識山堂望廬山于三百里外最爲楚東之勝慶朔堂范希文爲守時剏取古諸侯藏朔之義後作詩云慶朔堂前花自栽便移官去未曾開年年憶着成離恨祇託春風管勾來公于堂前又栽九松未幾移潤州故作此詩所謂芝產三莖松栽百尺卽此○徐湛鄱陽記曰



東晉王廙爲鄱陽內史立學北門內圖孔子及七十二弟子學徒八百餘身按廙傳以壬申歲見用爲鄱陽內史于時郡內有枯樟更生卽松陽門豫章之事○塚廟記云吳臣廟在鄱陽縣北一里其廟神與閩越王無諸並坐梅鍋配享按漢書臣乃吳芮子成王也志有長沙吳文王廟在城中毛家巷卽鄱君廟廟傍作芝山道院度道士以掌之我太祖旣滅僞漢乃入鄱城謁吳芮廟循行廊壁見有畫竹其傍題云幽人無俗懷寫此蒼龍骨九天風雨來飛騰作靈物嘆想之間誰作或對郡人胡

閩也卽日召見留帳下官都督府經歷遷補進大理少卿靖難死焉○澹津湖在城中央一名市中心湖納一城之水由大龍小龍二橋經德化橋穿城而出合鄱江水雖淺而大旱不竭湖西古有鳳池湮塞已久洪武初有濬得一小臺乃起磚甃命工鑿開得銅可五石不知其由○大龍橋在澹津湖心梁天監中建者小龍橋在湖西德化橋卽朝宗橋也在延賓坊又有斷橋卽王公橋宋隆興中王十朋出知饒州踰年乃移夔州民走諸司乞留不得斷此橋以阻之公乃以輕車從間道去○方輿



勝覽云郡城上有四望亭范仲淹建王相記汪彥章詩縱橫盡得江山勝俯仰方知宇宙寬千里風煙環廣坐四時星斗轉危闌王十朋詩有澤宜觀水無簷不礙山番君千里國俯仰一亭間○秋水觀在子城上王雪坡在州宅西江湖偉觀樓在行春橋側俱宋時建○東城曰永平門取南唐名郡為永平軍也唐時鑄錢之處有問鑄堂宋時于此立永平監洪邁詩澤國春寒未見花一江流水夕陽斜我來試上津頭望問鑄堂前有幾家○玄妙觀在永平門西晉咸寧二年建舊址在湖水北層

樓迥閣樹樾森秀唐大中二年稍圯忽一夕地震如雷殿堂四十餘間盡移湖水之南布列不殊舊制郡守上聞易名神運閣後改名開元觀宋周伯恭建望戴軒于觀東取望戴叔倫故宅之義元元貞二年改今名張景脩望戴軒詩開元觀前莫騎馬叔倫宅在湖水濱高閒隱士不趨府瀟灑使君為作堤胡不乘興泛短艇湖中自有尋幽徑白雲隨過水晶天清風載入琉璃境我來此軒逢羽人何必見戴寂寞濱君不見子猷當時風雪夜至今扁舟在圖畫吳金部前題茂林脩竹岸西東白鳥



行邊釣舸風市井恰當荷蓋外樓臺渾在柳絲中  
煙濃湧出金仙塔雲薄飛來玉帝宮更問戴家何  
處是放生池沼畫橋通○鄱江樓在南城上唐錢  
起有陪使君叔鄱江樓宴鄭中丞詩按郡中諸樓  
觀皆屢更名惟此不改○鄱江在城南一名長港  
其源有二一出泊山合婺源經德興樂平而來一  
出祁門張公山經浮梁而來會于城東唐白居易  
夜泊鄱江明月滿深浦愁人卧孤舟煩寃寢不得  
夏夜長于秋苦乏衣食資遠爲江海游光陰坐遲  
暮鄉國行阻脩身病向鄱陽家貧寄徐州前事與  
後事豈堪心併憂憂來起長望但見江水流雲樹  
靄蒼蒼烟波澹悠悠故園迷處所一念堪白頭○  
鄱江之濱多柳宋知州史定之所植以休息行人  
今呼史公柳柳林港之名本此○懷蛟水在縣南  
二百步江中流石滌潭中往往有蛟浮出時傷人  
馬歲五月五日鄉人競渡于此○柳公樓在城西  
北角梁柳惲爲鄱陽守所創凭眺顯豁實江國之  
勝景唐大曆中第五琦改爲望陽樓貞元十九年  
李吉甫復其名循舊迹也舊經云柳惲字文暢聽  
吏屬得盡三年喪禮署之文教百姓稱焉○北城



為靈芝門門外一里為芝山本名上素山楊盈川集云唐龍朔元年薛振為刺史北岡巔產芝草三莖郡人為立芝亭危坡屹起可眺匡廬范仲淹詩樓殿冠雀兔靈芝安在哉雲飛過江去花落入城來得食鴉朝聚聞經虎夜回偶臨西閣望五老夕陽開口葉夢得石林詩話云劉季孫以左班殿直監饒州酒稅題詩務壁云風吹燕語落簷間底事驚回夢裏閒說與傍人渾不解杖藜携酒看芝山王荆公為江東提刑巡歷按務見之大稱賞問誰作或以季孫對召與語嘉嘆乃升車去不復問務

事口山頂舊有鹿頭廟其神為樊噲宋范仲淹守饒時禱雨有應遷廟于山麓元豐三年郡守馬淵為請于朝封福寶侯口宋末宗室有隱居芝山者不署名氏間或自稱為緣督人但呼之為緣督先生習天官遁甲鈴式諸書一日坐山下酒肆逢一丈夫索酒酣飲因日先生曰汝來何遲乃遺以囊中丹書自稱為扶風石得之先生自是往來海上獨居十年註周易數萬言已而棄去乘青牛山水之間人不見其有所齋而資用未嘗乏所著易注及兵家方技諸書皆不存所存者革象新書而已



○鄱人丞相江萬里見忌于賈似道退居饒城會  
襄樊破萬里乃鑿池芝山後圃扁其亭曰止水人  
莫喻其意及聞警執門人陳偉器手曰大勢不可  
支矣余雖不在位當與國存亡城破竟赴池死子  
鎬及家人相繼皆赴之積屍如疊明日萬里屍獨  
浮從者塋焉贈太師益國公謚文忠○芝山詩塚  
國初宋濂銘云鄱有奇男子曰魯脩結詩社朋十  
人皆緣情喜賦于時鄱數罹兵脩懼其詩失傳埏  
埴爲甃刻瘞之芝山瘞已屬其爲之銘銘曰河清  
嶽明効神之靈何蕤葳兮馬文龍章於燦其英昌  
厥辭兮冥智斂真反諾至神種黃墟兮洩于醴泉  
三秀千珉合真符兮鄱山可夷鄱川可夷道如初  
兮○縣學在東門外范文正公所遷也初學在城  
內興賢坊景祐間公見城東地因指曰東湖爲研  
督軍臺爲印浮圖爲文筆峰使學遷此當出大魁  
至慶曆間始從其言而彭汝礪馬廷鸞江萬里相  
繼及第○宋毛滂采芹亭記云此邦俯仰几席間  
無時不與山水接東湖其最佳處東湖一名督軍  
湖在城東下流入鄱江秦番令吳芮將梅鎬習水  
軍于此宋治平二年于湖中建寺曰淨洲元吳存



詩橋邊翠掩小家樓新釣魚肥酒旋斝可是東風  
能喚客青帘飛過柳梢頭黎廷瑞詩游絲窈窕織  
春暉楊柳人家半掩扉一片暖風篩雨過杏花踈  
處見鶯歸葉楚庭詩百花洲渚漾晴暉野色青葱  
好染衣寂寞離亭春欲暮水田漠漠鷺鷥飛○薦  
福山在城東三里督軍湖之北山有萬松關茶園  
百花洲唐儀鳳間有慈濟禪師自閩來居寶應山  
因往來于此常與虎偕行號伏虎禪師後乃築室  
而居至開元開始建寺名薦福德宗時潤州戴叔  
倫來訪刺史馬戴戴爲築宅湖上居之或曰薦福  
寺其址也寺中有歐陽詢書碑冷齋夜話云范文  
正公守饒時一書生獻詩甚工自言平生未嘗飽  
公私憐之未得其策時薦福寺碑墨本直千錢文  
正擬榻千本俾售之京師紙墨已具一夕雷擊碎  
其碑口志云顏真卿爲刺史日作亭以覆歐陽碑  
後人目爲魯公亭方輿勝覽載歐陽率更法帖云  
余年二十至鄱陽喜其地沃土平衆士往往輳聚  
則寺碑或卽鐫茲時輿地碑目云唐薦福寺庄田  
記乾興元年僧志全文○贛洲門郡西門也門外  
有觀魚臺相傳番君所築其下有落照池濶九十



步池內有走馬埒○門外有盤洲洪丞相別墅在  
焉有野處二字宋孝宗爲洪邁書邁字景廬樂平  
縣人皓之季子中博學宏詞科紹興中充金國報  
聘使至金閣門見書不合式令改陪臣二字鎖之  
使館三日不通水漿不屈歸授端明殿學士致仕  
所著述有四朝史記夷堅志容齋隨筆續筆三筆  
四筆○北朝天門外有洪樞密遵別墅名曰小隱  
又名盤洲菴遵字景嚴其兄适字景伯弟卽邁也  
适遵同中博學宏詞科适仕樞密使有盤洲集遵  
仕樞密同知資政殿學士又有雲竹莊瓊花園皆  
諸洪別墅云○嶽廟山在城北五里一名千峰山  
上有東嶽行祠宋時山下民楊玟有一犬甚愛之  
每出入必與俱一日醉過嶺北酣卧草間野火將  
逼犬急以身受水濡草者數四因而得免鄉人異  
之遂名其鄉曰義感○五里堡有崩壙中露微光  
傳是鄱陽忠烈王墓薛用弱集異記云蕭穎士南  
游濟瓜洲有二少年熟視穎士相顧曰此人甚尙  
鄱陽忠烈王穎士固是鄱陽曾孫卽自歎陳二人  
遽負擔去穎土方驚以爲神至明年過盱眙見堦  
下伏囚則二少年也因述曩語邑長遂詰之對曰



嘗發鄱陽王塚當門有貴人姿狀正類蕭功曹固知其爲胤耳○閤山在縣南十里舊傳宋太守毛祐之巡境宿于山下夢見人自稱楚王陳涉來謁遂興造樓閣祀之因以爲名山有古仙白子高壇宇常有睥目獸依祠不爲人害○風雨山在城北十五里古之雩壇也禱之必應○馬跡山在城東北二十里山勢縈旋衆峰環拱道書五十二福地也山石上有馬蹄跡故名漢末邑人王遙有神術治病不用符水針藥但以八尺布帊敷之卽愈有邪魅者卽畫地作獄叩石呼魅入之居常佩一竹篋忽一夕大雨使弟子錢未以九節杖擔篋出行衣皆不濕前有炬火引道三十里許登一小山入石室中有二仙名謝稚堅繁陽子先在室中遙至開篋出古竹簧三枚三人並鼓良久仍納篋篋中使未擔還百日許天復雨獨擔篋而去越三十餘年弟子又見遙在此山煉丹晉元康二年白日飛昇宋范仲淹題馬跡仙壇詩靈壇拱上百神清碧塢紅霞相映明曲徑已無青草合亂峰時有白雲生亭亭翠燾高山轟隱隱狂雷落石轟待得九霄鸞鶴馭玉書應改地仙名○縣西南二十五里嶺



洲水際唐貞觀末中天忽雨雹因而生蚌自後土人往往採珠于洲中洪內翰贛洲居取此○堯山在縣西水路三十里鄱陽記云堯時九年大水民皆避此因以爲名他時大水山不見沒謂是浮山元祐中餘干進士都頡稱堯山百姓有陶唐之遺風焉唐劉長卿題王少府堯山隱處簡陸鄱陽故人滄洲吏深與世情薄解印二十年委身在丘壑買田楚山下妻子自耕鑿群動心有營孤雲本無着因收溪上綸遂接林中酌對酒春日長山村杏花落陸生鄱陽令獨步建溪作早晚休此官隨君

水棲托○鄱陽湖在城西四十里收江饒衢徽之流會大江入海跨南昌南康饒州三郡廣袤數百里東界屬饒春漲則與鄱江接聯水縮則黃茅白葦曠如平野宋趙抃詩拾陸事川程霜天曉色明長波萬頃濶大舸一帆輕靜唱溪漁樂斜飛渚鴈驚雲開見樓閣隱隱是芝城○陶母墓在城南四十里晉司空侃母湛塋處卽形家牛眠地也按氏族大全侃本鄱陽人今城中延賞坊有故居其後乃徙潯陽○雷義宅在城東北六十里南和鄉地名大雷岡宅基中有井井中有鐵鑊按義字仲公



鄱陽人初爲郡功曹常免人于死謝以金不受  
密置于其承塵上而去後舉孝廉又舉茂才

陳重鄉里爲之語曰膠漆自謂堅不如雷與陳志  
云南和鄉兩峰並峙東爲大雷岡雷義所居西爲  
小雷岡雷煥所居○南和鄉有黃金采西漢地里  
志云鄱陽武陽鄉有黃金采采者米取金之處今  
按本鄉有武陽縣故址當卽其地○鄱陽舊縣城  
東三里有螺螄洲鄱陽記曰吳太平二載大饑猛  
獸害人孫權使趙達占之曰天地川澤如人四體  
患軀炙脚其疾卽愈今鄱陽水口暴起一洲形如

鼈食此郡風氣宜祝以太牢掘其背以壓之今掘  
處猶可驗按卽螺洲也○螺螄洲爲鄱江之上流  
南岸夾汀其水最清隋梁文謙刺饒日嗜此水後  
人思其廉因名清潔灣○韓山在城北六十里上  
有韓信祠未詳一作寒山今改安山我朝淮殿  
下窰安在焉○紀勝云縣西北石步山有石室石  
堂殿其中恒烟靄人不可近縣北有二石碣立兩  
山夾澗者名石門山又北有車門山形如兩輪有  
梅鉤廟在其處今屬車門村宋慶元六年五月村  
人曹氏屋上生白蓮花高二寸濶三倍之次日化



為菊○仙鶴山在縣東八十里上有三峰峰有湖  
 春冬不竭衆鳥翔集中峰古觀壇地高三丈松竹  
 森聳古老相承是張道陵學道處今立仙鶴壇○  
 廢鄆陽縣在縣西北百里漢高帝六年置宋永初  
 二三年廢志調鄆陽山在縣南百里一名郭璞山相  
 傳郭景純嘗寓山下未詳○西峰井在縣南一百  
 里唐有西峯禪師好吹鐵笛嘗登妙果寺塔其高  
 十七丈吹笛于塔尖風雨驟至一日至白湖山以  
 錫杖挿地遂成此井○魏石山亦去縣百餘里又  
 名獅子山高十丈自頂至趾皆石巉巖峭壁下臨

溪流有龍居寺宋岳飛統兵過此題詩云魏石山  
 前寺林泉勝復幽紫金諸佛相白雪老僧頭潭水  
 寒月生松風夜帶秋我來囑龍語為雨濟民憂○  
 三國志云吳天璽元年鄆陽歷陵有山石文理成  
 字凡二十字曰楚九州渚吳九州都揚州土作天  
 子四世治太平始又云石印發封天下太平按志  
 卽鄆陽山也在城西北一百十五里鄆陽湖中初  
 名力士山亦名石印山江表傳云歷陽有石山臨  
 水高百丈其三十丈所有七穿駢羅穿中色黃赤  
 俗相傳謂之石印下有祠屋巫祝言石印神有三



郎昭運遣使以太牢祭併以印綬拜三郎爲王○  
徐鉉初學記云鄱陽山中有木客自言秦時採木  
造阿房宮避役于此木客能詩嘗來城市中與人  
飲作詩云酒盡君莫沽壺傾我當發城市多塵囂  
還山弄明月○志云獨角山卽獨山在縣北一百  
五十里高二十丈峭石瀕湖唐王德璉記有獨角  
獸居此故名○白沙在縣西水路一百二十里沙  
白如雪因以爲名史記索隱豫章接鄱陽界地名  
白沙有小水入湖名白沙湖湖東南有武陽亭亭  
東南有地名武林當閩越之京道漢元鼎初東越  
王餘善使吞漢將軍入白沙武林唐劉禹錫答亮  
饒州書餘干有畝鐘之地武林有干章之木卽此  
○浩山在城西北八十里界鄱陽彭澤建德三縣  
高數百仞周廻百餘里唐武德間李大亮奏置浩  
州于此○英布城在縣西北百五十里布爲吳芮  
婿使之將兵屯此漢書英布敗于會稽遂南走渡  
江爲長沙哀王所誘至鄱陽鄱陽人殺之茲鄉志  
云布塋在城北甍文皆作虎像墳高三丈八尺○  
漢蜀太守文翁宅在縣東一百五十里基址俱存  
東帶鄱陽左連溪水西接望夫岡有井清澄隴前



栽梧桐樹○鐘潭在縣東北一百五十里梁大同  
開靈鐘寺鐘鳴徹百里太清二年詔取入朝扣之  
不鳴送還至此遂沉于潭使者命縋百餘丈壯士  
千人取之甫出而縋絕竟莫能舉○廣積故城在  
縣西北一百八十里今名廣晉鄉有城基晉書有  
廣晉縣云

餘干縣

在府南百二十里

漢之餘汗縣也淮南王書田于餘汗卽此隋開皇  
始去水傍曰餘干○史記貨殖傳云譬猶戎狄干  
越之不相入韋昭注干越越之別名今餘干縣也

古謂越之餘地亦曰餘干○寰宇記云干越渡去  
縣西南二十步置津吏主守四時不絕有浮橋唐  
大中元年縣令倪衍置按卽餘水處也漢書地理  
志餘水北至鄔陽入湖本自信州貴溪縣流入○  
志云餘水者會縣之西南諸溪餘水故名以其三  
道而入又名三餘水或曰吳楚越之餘也○舊經  
云餘干山在治東南南曲轉相向狀若羊角舊名羊  
角山唐天寶六載勅改今號亦名雙覆峰宋邑人  
饒魯號雙峰本此山有龍池及梁天監中昌谷寺  
王安石詩老龍天上回峰頂石池開噓浪亂晴旭



蟄沙驚凍雷蓋指此也池畔爲乘風亭晴天開朗  
可望匡廬宋熙寧中建張樞密浚寓餘干時嘗與  
二子柘杓登之趙丞相汝愚別業在焉自題吳楚  
冠冕四字□山下爲煮泉亭相傳唐陸羽每汲水  
煮茶于此今石竈猶存按鴻漸毘陵人居餘干時  
號東岡子居茗溪號桑苧翁居故鄉號毘陵子□  
雲風堂在羊角峰之東山書院宋趙汝靚建汝愚  
從弟也朱晦菴嘗寓其中及汝愚死來吊復館焉  
以暇註離騷經于此○藏山在縣西一里懸崖處  
多古梅曰梅巖有宋理宗御書梅巖二字刻于石  
有溪山風雨亭是趙忠定讀書處山雖不甚高而  
崖壁微峭爲奇○玉馬山在縣南上有白石如馬  
舊呼白馬山唐天寶間勅改今名山自撫州南城  
縣過入臨川縣凡歷三邑乃分一支入當縣○冕  
山與冠山相對隋末林士弘退保餘干敵至市民  
避居此山上因而得免號曰冕山後乃作冕○冠  
山卽羊角山也峰多奇樹惟石前瞰琵琶洲寰宇  
記云江山迴抱積沙而成洲狀如琵琶也唐時韓  
賓客裴尚書李侍郎皆曾居此○干越亭唐興元  
中李德裕爲令時建去縣東南三十步屹然孤嶼



多古留題宋顯苑云楊億咸平初罷處州赴闕道  
 經餘干登干越亭亭前瞰琵琶洲後枕思禪寺林  
 麓森鬱千峰競秀真天下之絕景也古今留題凡  
 百餘篇劉長卿詩天南愁望絕亭上柳條新落日  
 獨歸鳥孤舟何處人生涯投越嶠世業陷胡塵草  
 色迷征路鶯聲傍逐臣秦臺悲白首楚渚怨青蘋  
 杳杳鍾陵暮悠悠鄱水春獨醒翻一笑直道不容  
 身得罪風霜苦全身天地仁青山數行淚滄海一  
 窮鱗流落機心盡空憐鷗鳥親張祐詩扁舟亭下  
 駐烟波十五年游重此過洲嘴露沙人渡淺樹梢

藏竹鳥啼多施肩吾詩琵琶洲上行人絕十越亭  
 中客思多月滿秋江山冷落不知誰問夜如何王  
 十朋詩我來鄱君山水州山水入眼常遲留絕勝  
 遙瞻雲錦洞清音下瞰琵琶洲干越亭上越風起  
 湖繞鄱陽三百里曉來一雨洗清秋身在江東畫  
 圖裏汪洋元渤詩塞外風烟能記否天涯淪落自  
 心知眼中風物參差是只少江州司馬詩姜夔詩  
 松尾颼颼石浪寒胡啼蕃曲轉聲酸人間無此春  
 風手應是江妃夜夜彈梅堯臣詩餘水之干越之  
 鄙築臺相對琵琶尾琵琶日日有秋聲鴈過洞庭



風入葦口唐韋莊過饒州餘干縣琵琶洲有故韓  
賓客裴尚書李侍郎舊居遺址猶存莊因感舊爲  
之和吟云琵琶洲水斗牛星鸞鳳曾于此放情已  
覺地靈因昴降更聞川媚有珠生一灘紅樹留佳  
氣萬古清絃續政聲戟戶盡移天上去里人空說  
舊簪纓○白雲亭亦贊皇公建在縣西南八十步  
與干越亭對峙跨古城之危瞰長江之深取劉長  
卿登餘干古城起句因以爲名黃庭堅詩曩誰築  
孤亭勝日有感遇永懷劉隨州目榜白雲句遺老  
不能談歲月忽成屢按志謂縣治西白雲古城隋  
末林士弘築白雲亭之名或本此○寰宇記云龍  
窟河在縣南十五里源出廣信之興業溪西流入  
鄱陽湖古有龍窟驛○鄔子港在縣西北二十里  
餘水之支也水口卽擔石湖唐竇叔向詩曉發漁  
門戍晴看擔石湖日銜高浪出天入四空無咫尺  
分洲島織毫辨舳艫渺然從此去誰念客帆孤擔  
石湖已見南昌○雕峰山在縣西南三十里有宋  
勅葬趙丞相汝愚及子尚書崇憲墓○漢東越傳  
餘善使吞漢將軍出武林白沙以禦漢白沙已見  
鄱陽縣下武林卽志之武陵山也在縣東北三十



里元末兵亂吳宏立營于此山下有溪爲武陵塘俗名後溪劉長卿宴餘干後溪詩迹遠親魚鳥城高壓鼓鼙林中阮氏集池上謝公題戶牖垂藤合藩籬插槿齊夕陽山向背春草水東西看竹誰家好尋花幾路迷何勞問秦漢更人武陵溪○族亭湖在縣西水路八十里湖中流分當縣及南昌二界按鄱陽記後漢張遐字子遠餘干人七歲日記萬言嘗侍徐稚過陳蕃時郭泰吳炳在坐稚曰此張子遠也知易義蕃問易大旨遐對以易無定體強名曰太極云云蕃顧炳曰若何炳良久曰得之

矣舉孝廉補郡功曹不就關西楊震曰遐年未二十積書若此當爲天下後世儒宗建寧間召爲學士以疾還四方學者萃其門卒贈族亭侯所著有五經通義筮原龜原吳越春秋外紀○康郎山去縣五十里卽鄱陽湖之南涯也山上有忠臣廟祀國初征僞漢死事之臣公一人侯十二人伯二人子十三人男八人序其位次塑其像貌凡三十六人相傳昔康姓者居之故名又謂山名抗浪謂能與浪相抗語訛康郎○龍女井在縣西南六十里五代楊吳時有蔡氏女十六不嫁父母強之不可



因投此井覓之無迹但見雙履浮水上時以爲龍女旱則祈于井上○縣東南七十里小廬山後亦有龍井以禱雨宋安仁人尚書湯漢讀書之所名黃蘗山○縣南七十里有小華山謝枋得嘗陟其巔曰此宜居隱德之士又十里爲李梅峯高百丈餘周三十餘里一名平原峰又名貞女峰五代時李峻梅用居之故名○縣西南八十里有五彩山相傳吳王夫差六世孫吳申事楚考烈王以諫封春申君謫居于番又自番徙居此山下生子卽芮也初生時有五彩雲氣繞山故名

### 樂平縣

在府東百二十里

雷次宗豫章記云漢永元中置樂安縣按在銀城去今縣東水路三百二十里德興縣界中陳天嘉元年嘗廢唐朝建立亦在銀城後因歛寇程海亮剽掠兼山勢險峻地壠高下乃移于常樂水口卽今所也元和郡縣志以南臨樂安江北接平林故取名焉○寰宇記云樂安江源出縣東北扶餘嶺合餘干水入又有明溪銀溪石吳溪並流注之舊圖經樂安鄉有釣臺巨石上有雙膝迹宋許惟中詩何代何人把釣緝至今猶有釣臺存身名俱隱



成真隱呂涓嚴灘未足論○輿地記云吳溪山在縣西有石室東西相去七十步中有石鼠石人等像○薛塘在縣北隅以薛仁輔得名也按仁輔字汝弼河東人官大理少卿秦檜構岳武穆下獄理官拱手而聽惟仁輔不署奏牘且明岳無罪檜怒謫編管饒州得赦移樂平卜居此塘上○天仙池在縣東北天仙觀前相傳唐貞元中月夜有二羽衣對語橋上久之各跨鶴上天後人因于此立觀○蕭家庄蕭梁元帝封子恢爲鄱陽王此庄乃給王宮脂澤者王去郡捨庄爲因果寺俗呼爲使君

庄按卽今安隱寺也在會昌鎮唐會昌末刺史表請以因果寺爲花曆鎮以本縣權知鎮事自後將權重令權輕民苦培克歷五代迄宋鎮始廢○儒富庄在縣界馬廷鸞記曰叔翔旣築儒富庄余往過焉縹囊緗帙魚魚雅雅其崇如壙云云攷志叔翔不載其姓名馬廷鸞則字翔仲樂平人登淳祐進士爲國子司業考者作甚多端臨其子也增續杜佑通典名文獻通考○登高山在縣東五里元人九日登高于此朱公遷詩有苦無黃菊供人摘只爲青山了此行之句公遷邑人得饒雙峰之學爲



處州學正○汰金洲在縣西十五里平沙臨水先  
有赧金塲開元已後廢又五里水口亦出赧金郡  
國志云鄱陽之土出金披沙淘之粒大者如豆小  
者如麩山中亦生銀苗唐饒州刺史制詞鄱有鎔  
銀之利指此○饒娥雙闕在縣東三十里長城鄉  
其制作有廳事步闌前列屏樹烏頭正門闊闕一  
丈二尺烏頭兩柱相去一丈柱頭安瓦墀墨染故  
號烏頭門外築雙闕在烏頭門南高三丈一尺夾  
街十五步對植槐柳蓋唐制也柳子厚碑記云娥  
饒人饒姓娥名雖小家未嘗出游治締葛供女事  
循整世漁鄱水父醉風卒起不能舟遂以溺死水  
屍不得娥走哭水上三日不食耳鼻流血氣盡伏  
死明日屍出龜魚蠃蛟浮死萬數塞川下流鄱傍  
小民悲泣怨號以爲神奇縣人鄉人會錢具儀塋  
之鄱水西橫道上追思不足相與作石以貽後世  
云云按娥居于長城鄉淡灘里墓亦在是建中二  
年黜陟使鄭叔則爲列于朝得旨卽所居爲建雙  
闕唐魏仲兗魏愔俱有饒娥碣□朱晦翁跋饒娥  
卷二云予少嘗學書而疾腕弱不能立筆遂絕去不  
復爲今觀沙隨程迥此卷饒娥辯一紙蓋有意于



黃綸之碑者亦可愛也娥故居小廟在樂平縣東三十餘里予嘗持沃茗酌之雙闕已不復存因語州縣宜爲增葺且請勅額列祀典而莫有應者可嘆也慶元戊午十一月二十六日劉伯醇携此卷來求跋爲書以歸之○鄱陽記云石墨山在樂平縣西三十八里其山出石似墨天寶六年勅改名樂平山併改石硯山爲乳泉山乳泉去縣北六十七里內有石如硯山西出泉色白如乳○石城巖在縣南六十里一徑縈迂而入行十餘里間皆惟石少卿李常題曰叢玉龍眠李伯時寫爲圖曾肇

彭汝礪諸人皆有詩一名仙人城城內有會仙洞○縣東六十里芙蓉山形如菌蓋上合下開宋楊萬里詩看山須是高處看低處看山元不見君看矮子仰高人祇見長身不見面今晨雨止升火輪一光銷盡千山雲千山數日眼中失今晨頭角都崢出初登峻嶺心猶驚上到絕頂忽眼明天外數枝青玉筆飛入錦囊何突兀兀問來還是芙蓉尖闊開兩窓高捲簾○縣北六十里鍊銅山唐置場冶山下以供永平監歲鑄後開鑿無度山傾其水發爲河○縣東七十里一山有石像肖吳番君芮謂



之石吳山有吳王墓以爲芮塋處迹石吳者爲葛  
山相傳葛仙翁曾來游上有李氏讀書精舍宋邑  
人郎中許錫詩平時西北望山峰我忽西行山又  
東東望不如西望好只緣身在此山中○天井巖  
在縣東北九十里高聳百餘丈盤亘四十餘里中  
有洪巖風巖桐木巖冷水巖而洪巖最著其中雲  
氣與泉聲相雜山腰有石室南北相通方四十丈  
石之如門如堂如帳如象如馬者甚多志謂洪源  
山下金山鄉是洪忠宣公故府○梅花巖月山巖  
俱在縣東界梅花巖深三十丈南北相通有井有  
田有竈有澗有池皆石也池深莫測一山之水皆  
歸焉上有古梅數十株宋程夢子詩烟中脩竹列  
千竿空裏疎花尚可攀喚醒羅浮山下夢江南還  
有廣南山○月山巖又名月巖宋晁公富來游題  
云古松夾道行行漸高殿堂室廬皆在虛竇中如  
月之初弦然○縣東北八十里鳳游山山勢盤礴  
爲嶽饒間一巨鎮舊名濬源唐始改今名山麓有  
石竅廣尺許日常兩潮其出洶湧收則乾涸謂之  
潮泉宋楊簡詩妙藏天地秘神斧爲誰開水性元  
流下山靈強勒回○志云靜里鄉有鴈塔宋永湯



鑄建以題進士名第者譚應斗記○桐山鄉有長  
樂舊城唐開元建樂平縣處今名長樂水口○未  
善鄉披雲閣下有靜蛙池馬廷鸞讀書閣上苦蛙  
夜鬧戲以楮爲三木曰再喧罪汝自後池無蛙聲  
間產蛙皆白頸○豐樂鄉之鷓鴣山萬全鄉之石  
潭山樂安鄉之軍山皆有黃巢駐迹按志巢寇兵  
禍樂安凡三罹王仙芝攻饒太守顏標死之淮南  
高駢將張濬擊賊至饒敗死其黨黃揆縱兵焚樂  
平柳宰尹拒不克又死之

浮梁縣

在府東一百八十里

唐武德二年析鄱陽東界置新平縣尋省開元初  
復置名新昌治在昌江口正東臨江○輿地志云  
新昌治當齊安平王祠對衝前後宰多不得終秩  
開元二十四年制署治有不穩者任從更改于時  
鄧暕爲新昌令移于舊縣城北昌水之西天寶元  
年以溪水時汎伐木爲梁因名浮梁元和間觀風  
使裴戡請徙高阜爲令治宋因之元陞州 國朝  
仍爲縣○白樂天琵琶行云商人重利輕別離前  
月浮梁買茶去蓋唐時此縣產名茶故宋郡國志  
云浮梁茶美也○昌江源出縣東八十里外西流



會諸溪水經縣城南入鄱江鄱陽記云水口有廟  
百姓禱無虛日興元道士屈蘭子棄木人急流曰  
靈則泝流否則焚汝木人竟逆流于是爲之改建  
卽所謂齊安平王也○唐末黃巢之亂縣令金日  
安徙百姓居于南城直昌江之南其地有浮碧亭  
山水竒勝宋張景脩詩一潭秋水不見底十里曉  
山無盡頭○漫吾亭在縣東龍潭上宋尚書程瑤  
自記其畧曰暇日與二三友縱步潭東南隅披榛  
斬荆臨渠而植樹則水聲嘈呶如鼓鏞入渠澄甚  
透迤徐行出芰荷延蔓數十丈可俯而翫也外瞰  
長溪波光映人泫泫滔滔番水之源發焉遠則喬  
峰層巘卓然拱立輸青而聳翠爰卽渠上爲亭名  
之曰漫吾昔元次山浪漫于世故人呼爲漫郎久  
更以爲漫叟頽其溪曰吾溪其亭曰吾亭又窮其  
山之高絕處其臺曰吾臺遂欲擅有此亭此臺此  
山此溪曾不知其無往而非漫余方因此溪山爲  
是亭也兼三五繫之以漫又豈特爲叟爲郎有仕  
與處之殊哉□瑀讀書處名青峰山去縣東一里  
古識青峰圓出狀元瑀詩云爲問青峰圓也未不  
應久負壯圖人後果登第爲名臣○縣北湖有進



士庄元邑人趙源置其孫鎮遠請以庄建書院名曰雙溪聘進士趙介如爲山長○石崖山在縣北臨溪山如鼓狀又曰鼓樓山在縣東里人保聚之所也其處有新田書院宋李椿年建○朱龜孫宅在縣東五里山先是有道人至此云文山秀拔當出王者師龜孫果拜太子諭德爲度宗傳後因名王師山○陽府山在鎮前冬無積雪凡物皆早成金君卿詩聞雷已薦雞鳴笋未雨先嘗雀舌茶以其地暖故也山形峭立溪側下有陽府寺泉石稱幽勝屬西興鄉水土宜陶宋景德中置鎮以陶所

謂景德鎮也 國初因元舊置稅課局正德初年始置御器廠于是有官窰民窰之分○宋彭器資尚書文集有送許屯田詩曰浮梁巧燒瓷顏色比瓊玖因官射利疾衆喜君獨不父老爭嘆息此事古未有註云浮梁父老言自來作知縣不買瓷器者一人許君是也作饒州不買者一人今程少卿嗣宗是也惜不載使君之名○志云縣西三十里萬戶山其北有石鼓山東有金魚山古老言晉郭璞過此曰當有封萬戶侯者出至宋程節始應之○按節字信叔其弟筠字德休俱登嘉祐進士節



帥桂府至寶文閣待制筠知陳留縣宣仁太后稱之擢戶部郎中蘇軾詩君爲赤縣有古風政聲直入明光宮者節之子鄰負有將畧節旣卒官蠻夷反側廷議以鄰代父蠻人帖服如初○洞靈巖在縣東三十里有洞四謂慶雲蓮花含虛張公也唐文宗時邑人鄭全福入靈巖洞脩煉嘗游桃花溪見老人乘鐵船全福曰願借船還人間老人許之曰後三年當復來時已百餘歲語門人曰死必塋我浮梁白水鄉及舉棺輕疑而發之惟杖屨而已有夕陽嶺在洞靈巖後世傳藍采和嘗吹笛于嶺

上○水龍巖在縣東四十里有水潛行地中而出于巖左迤南曰鳳游巖有大石空避亂者居之○九英山在縣南五十里唐末邑人甯廩據此以禦黃巢廩九子名皆從山故名九英也今有甯將軍廟在常尚都○縣東北五十里有一沙堆狀如覆船鮮淨特異每年豐稔其沙卽堆如舊若沙移向岸卽薄收○石藏山在縣西六十里中有鐘乳穴十數處其南爲石門山宋寶文待制彭汝礪讀書其上汝礪治平中狀元也有龍池在其山上○程山卽石吳山在縣東六十里陳時程靈洗之裔居



之族既盛大遂以姓呼山焉○徐謏記云鄱陽源水吳芮所居處今有廟鄉人時祀之祠東有石澗濶三尺祀時需水以牲牢告啟擊鼓三通水即湧流隨用並足與地紀勝謂芮宅有馬迹石有龍泉寺泉出石壁四時不絕漢梅銷宅亦在其處

安仁縣

在府南二百里

漢餘汗東南地西晉析置晉興縣永嘉七年改興安尋廢陳乃置安仁隸鄱陽郡隋開皇九年併入餘干今有故城去餘干百五十里唐武德初置長城縣在今長城鄉又廢宋開寶八年置安仁場于

此端拱元年陞縣迄今因之○縣治前雲錦樓下瞰錦水舊設雲錦驛于此水發源福建之光澤縣峭壁千仞絢錯成章故有雲錦之稱○楚東錄云縣東五十步一山名張微微為漢人學道于此牛餘年仙去有丹竈存○玉貞山在縣治北唐進士柳敬德讀書其上刻玉貞臺三字于石壁宋朱熹詩夙駕安仁道行行得此娛荒山圍野濶遠樹出林孤景晦暮烟合天寒碧草枯歸心懷遠路極目上平蕪○元歐陽玄張孝忠祠記畧云饒安仁玉貞山之惠寧廟左寓祠張將軍宋末將軍從江陵



守高達至元十二年兵下江陵達降將軍帥其徒  
淮士百人去之洪州是冬洪又降去之信州會提  
刑謝枋得守安仁斷橋柵爲拒乃帥所從赴謝軍  
授爲帳前都提點明年二月我師來自江右旣而  
自饒攻安仁將軍逆戰于團湖坪矢盡揮雙刀擊  
殺百餘人尋中流矢卒邑人憐而祀之廟享不絕  
○綵衣堂安仁周氏之居也宋無爲楊傑記云龍  
塘周氏五世同時子養其父而逮養其祖之祖父  
鞠其子而及鞠其孫之孫州閭鄉黨稱爲令族縉  
紳士大夫樂爲歌詠榜其堂曰綵衣傑謂前此百  
有餘年僭僞未克日尋干戈父不得保其子者有  
之子不暇養其父者有之矧有五世一時而安居  
者耶觀周氏綵衣之樂則海宇之昇平可知矣○  
孝烈橋在縣北二都弋陽謝疊山女嫁安仁周氏  
早寡聞其母李氏獄中死節遂出貲奩爲里人造  
此橋橋成投其下死因以孝烈名○衣錦橋在玉  
石澗上有唐人逢汝舟玉石寺碑中稱玉石雲岫  
巖巒甚竒澗亦幽絕去縣北已三十里○吳嶺在  
縣西南六十里相傳番君芮與車王戰于此其巔  
有洗馬池石上有巨人跡○仙巖在縣東南七十



里巖半有二十四穴人不能到與貴溪縣聯界此外又有燕巖鎖巖白雲鹽倉釣藤馬嘴楊子金仙諸巖相去不過十里○仙人城在縣東南二百里峭壁危石亭亭千仞每天淨無雲秋日清皎則其上宮殿倉廩鐵冶棺窆之屬歷歷可見世傳武夷山仙人歸葬于此○輿地紀勝云將軍墩在縣東七十里世傳郭元振葬處按元振開元中爲饒州司馬道病卒又有唐咸通元年柳將軍墓碑○積烟山在縣西南八十里宋末陳奉死節處奉字肇芳安仁人德祐初謝枋得辟置幕中益王卽位入觀領江東安撫使戰北被執得遁去復戰敗于積烟山與弟年同死之○縣東馬祖巖有瀑布泉其泉從山腰直下飛瀉百丈餘有白塔河源發廣信龍虎山及撫州金谿縣合流入錦江○興業水一名安仁港發源貴溪縣瀟石村經縣界合餘干江水港中有崩巖橫石懸水千仞湍奔浪激聲合風雷舟楫所歷少有程準篙工失手以毫釐便成壑粉然居人賴其膏澤之利溉田百二十餘頃云○碑目云南唐雙溪觀記乾德二年葉審文○唐自鳴山記咸通十年歐陽證文○玉石寺記唐逢汝



舟撰口羅漢寺碑記偽吳順義六年立已上俱在  
安仁

德興縣

在府東二百四十里

元和郡縣志云樂平有銀山在縣東百四十里每  
歲出銀十萬兩收稅七千兩亦名銀峰山宋程迥  
廳事記云唐貞觀中權萬紀上言宣饒銀大發帝  
斥之蓋謂銀峯也至武后之世用鄧遠議置場權  
銀號曰鄧公場晉天福三年南唐割據始置德興  
縣四面皆水取其地產銀惟德乃興之義耆老言  
方產白金時邑無俊造之民自元祐四年廢銀場

以來與計偕登科級者甲于饒之諸邑名儒巨公  
相望而出矣范仲淹詩三出專城鬢已霜一封奏  
罷鄧公場卽此○聚遠亭在縣治前邑人俞氏建  
郭祥正詩晴空風卷浮雲落萬里秋毫瑩寥廓  
娥泛月中夜來撲撲山川銀粉落天垂斗柄掛簾  
鈎地接明河浸闌處誰傾世界入冰壺滉漾仙春  
迷海嶽○紀勝云唐末徽二年土人張蒙逐白鹿  
至銀峰失其所在有少年指示之乃獲銀筍里人  
謂是五通神見其立廟祀之卽靈順廟也在縣東  
二百八十步廟記云天下之事此神實始于鄱陽



之區矣○官堂山在縣東南二里宋余欽持節使江南詔許歸省乃揭堂山下丞相張商英扁曰繡綵其子瀚復新之朱文公改曰官堂山因以為名○歲寒山在縣西二里周冕隱居其上鑿歲寒二字于石壁其下卽歲寒溪也水流通入龍溪宋注藻故居在焉○洪雅山在縣西北五里宋洪雅王貴宦此地國祚云亡因赴水死里人獲其屍塋此山下○紀勝云吳闡縣在縣南七里世傳番君嘗試馬于此又有吳王鑄印堆鳳凰臺走馬堤淬劍池大小花山今叅政張燾居之亦名吳園也○銅

山在縣城北三十里唐置銅場處山麓有膽泉先是土人汲以浸鐵數日輒類朽木刮去其屑煅煉成銅○大茅山在縣東南百里千峰萬壑深林邃谷爲縣諸山之冠○鄱陽記云石虹山有石室平砥如牀可容數百人旁列石鄣如屏風篆書凡八十三字有橫石跨水而渡文采青赤若虹蜺焉○建節水在縣西南源出廣信弋陽縣西北流經縣境下入樂安江○蘓文忠長子邁授德興尉公送之湖中見石鐘山記

萬年縣

在府東南百二十里

本鄱陽餘干樂平貴溪四縣之遠鄙我朝正德



七年姚源盜平析置以治倚萬年峰爲名○江西  
大志云德興界有萬年嶺宋廣王出此入閩曾賦  
蹕嶺下我正德六年江西盜起七年調兩廣土兵  
勦之前後俘斬萬餘姚源洞賊尚猖蹶復俘斬五  
千餘人以上官受賂遁去者多遂設萬年東鄉二  
縣○犁壁山在縣南四週突起盤旋如壁明叅政  
吳廷舉平姚源駐師于此○武山近貴溪縣界磽  
礪數里卽廷舉分守武山斷賊歸路者○姚源洞  
在縣東其深可十五里兩山並峙林木參天土田  
肥美曩爲盜藪○東門外有泉爲吳廷舉鑿土人  
德公滅賊以比于東漢耿恭井







